

# «Davairas muments nunemblidavels»

## Gieus olimpics a Sotschi

DA GION NUTEGN STGIER / ANR

■ **A chaschun dal rapport annual da la Brigada d'infantaria da muntogna 12 avain nus er fatg cun cusseglier federal Ueli Maurer ina bilantscha dals gieus olimpics a Sotschi. Inchantà è il minister dal sport era stà da nossas sportistas e da noss sportists grischuns.** Il gieus olimpics a Sotschi è istorgia ed ord vista grischuna è en quels stads in vair success. Da las 11 medaglias ch'ils Svizzers han fatg en Russia han tuttina gudagnà sis medaglias atletas ed atlets da noss chantun. Da quellas sis medaglias han lura schizunt gudagnà gist tschintg sportistas e sportists da l'intschess rumantsch. Fascinà da las prestaziuns dals atlets e da las atletas da la Svizra è er stà cusseglier federal e minister dal sport *Ueli Maurer*. El haja insumma gi' ina buna impressiun da Sotschi. L'organisaziun saja stada excellenta e la glieud saja stada pli che curtesaivla. Quels aspects positivs sajan lura vegnids embellids cun resultats fenomenals dals Svizzers. L'inscunter cun *Vladimir Putin*, il president da la Russia e hospitant, saja natiralmain er stà per el in punct culminant. Quai era cun betg esser stà previs quel inscunter en la chasa svizra. «Nus avain discurrì dals success dals Svizzers e cunzunt er dals gieus olimpics organisads stupent a Sotschi», ha ditg Ueli Maurer. L'inscunter cun Vladimir Putin saja stà curt, dentant fitg empernaivel. «Temas politics avain nus dentant betg discurrì», ha menziunà Ueli Maurer.

### La medaglia da Sandro Viletta

Ina vaira sorpresa saja bain stada la medaglia dad aur da *Sandro Viletta* en la

cumbinaziun. Cun quella nagin che quintava e perquai saja quella medaglia ina da las pli bellas, ha manegià Ueli Maurer. Plaschair haja el dentant er gi' da la medaglia da bronz dal team da hockey da las dunnas. Quella medaglia avevan paucs en vista, uschia che nus dastgain parter il plaschair cun ils «girls», ha ditg Ueli Maurer cun in surrir. Natiralmain haja la Svizra betg fatg en intginas disciplinas medaglias, persunter lura en autras cursas e quai nunspetgà. La medaglia da la qualla el haja il pli grond plaschair saja quella dad aur da *Dominique Gisin*

en la cursa rapida. Ella è ina sportista collegiala, ina dunna empernaivla e lura er ina atleta cun ina confidenza en sasez sco paucas autras. Dominique Gisin haja en tuts cas merità da turnar da Sotschi cun quella medaglia dad aur. Las prestaziuns da *Dario Cologna* cun duas medaglias dad aur sajan bain era stadas in dals bels muments dals gieus olimpics. Tut en tut haja el gi' a Sotschi numerus muments nunemblidavels. Il cussegl federal vegnia bain ad undrar victuras e victurs svizzers da medaglias da quels gieus olimpics, dentant per ina audienza persunala per

mintgin manca il temp. Sche quai saja il cas lura cun in retschaviment en cuminanza en collavuraziun cun Swiss Olympic, ha ditg Ueli Maurer. «Nus essan sin buna via d'organisar in retschaviment per noss atletas ed atlets, dentant saja anc nagut concret», ha menziunà il schef da sport da noss pajais. Oz deploreschia el ferm ch'el Grischun organiseschia betg ils gieus olimpics il 2022, gist cun vesair l'atmosfera fantastica quels dis ch'el saja stà a Sotschi, ha menziunà Ueli Maurer. Davairas donn che quai daventa betg realitad.



Cusseglier federal Ueli Maurer (san.) ha gi' plaschair da la visita nunspitgada en la chasa svizra, da Vladimir Putin, il president da la Russia.